



Sumáriu Kazu
Tribunál Distritál Baukau
Períodu Juñu 2021

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kualkér violénsia hasoru feto.

A. Sumáriu prosesu julgamentu kazu iha Tribunál Distritál Baukau

1. Totál kazu ne'ebé JSMP monitoriza: 14

Artigu	Tipu Kazu	Númeru
Artigu 145 Kódigu Penál (KP) & artigu 2, 3, 35 letra (b) no artigu 36 Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika (VD) sira no artigu 36 kona-ba krime sira violénsia doméstika nian hanesan krime públiku)	9
Artigu 145 KP & artigu 2, 3, no 35 letra (b) LKVD no Artigu 20 (1), artigu 2 (2 alinea f) Lei Arma Brankas	Ofensa ba integridade fízika simples ho natureza VD no Arma brankas	1
Artigu 154 KP & artigu 2, 3, no 35 letra (a) LKVD	Maus-tratus ba kónjuje	1
Artigu 20 (1), artigu 2 (2 alinea f) Lei Arma Brankas	Arma brankas	2
Artigu 146 KP	Ofensa ba integridade fízika grave	1
Totál		14

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77295795

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

2. Totál desizaun ne'ebé JSMP monitoriza: 9

Tipu desizaun	Artigu	Númeru
Suspensaun ba prizaun nia ezekusaun	Artigu 68 KP	9
Totál		9

3. Totál kazu sira ne'ebé adia tuir JSMP nia monitorizasaun: 0

4. Totál kazu ne'ebé sei kontinua prosesu tuir JSMP nia monitorizasaun: 5

A. Deskrisaun sumáriu julgamentu ba desizaun kazu sira

1. Krime ofensa ba integridade física simples ho natureza violénsia doméstika

Nú. Prosesu : 0118/20. BCBCV
Kompozisaun Tribunál : Singulár
Juis : Dra. Florencia Freitas
Prokuradora : Dra. Remizia de Fátima da Silva
Defeza : Dr. António Fernandes
Desizaun : Pena prizaun fulan 4 suspende ba tinan 1

Iha 02 Juñu 2021, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebe envolve arguidu JBBF hasoru nia aman, iha Munisípiu Baukau.

Akuzasaun Prokuradora

Prokuradora akuza katak iha 07 Outubru 2020, iha oras tuku 05:00 dadeer, arguidu rona lezadu tolok arguidu nia inan, nune'e arguidu nervozu tebe dala ida iha lezadu nia kabun mamar, buti dala ida iha lezadu nia kakorok no riba lezadu ba rai, nune'e lezadu tata arguidu nia kalilin no liman hafoin arguidu husik lezadu. Aktu ne'e rezulta lezadu nia ulun kona iha fatuk kauza kanek no raan.

Prokuradora akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2,3 (c) 35(b) no 36 LKVD.

Produsaun ba prova sira

Iha prosesu julgamentu, arguidu hili direitu nonook. Entretantu lezadu deklara katak iha akontesimentu ne'e lezadu lori sensor ko'a-ai atu ba ko'a ema nia ai, tanba ne'e lezadu hakarak atu ba sedu iha oras tuku 05:00 dadeer, nune'e lezadu fanu nia feen atu halo matabisu, maibé lezadu nia feen hader kleur loos tanba ne'e mak lezadu hirus no tolok. Derepente arguidu mosu mai tebe dala ida iha lezadu nia kabun mamar, buti lezadu nia kakorok, arguidu foin husik lezadu bainhira lezadu tata arguidu nia kalilin no liman parte loos, depoisde akontesimentu ne'e lezadu ba hato'o keixa iha polísia no ba halo tratamentu iha Sentru Sáude Wailili, bainhira arguidu fila husi sela polísia sira di'ak malu fali no to'o agora la komete ona krime hasoru lezadu no nafatin hela hamutuk to'o agora.

Testemuña MFB nu'udar arguidu nia inan no lezadu nia feen depoimenta katak iha akontesimentu ne'e lezadu ho testemuña diskute malu kona-ba atu prepara matabisu, lezadu tolok testemuña, ho nune'e arguidu halo agresaun hirak ne'e hasoru lezadu.

Alegasaun finál

Prokuradora haktuir katak arguidu hili direitu nonook maibé iha investigasaun arguidu konfesa faktu sira hotu, konfirma mós husi lezadu no testemuñ, nune'e prokuradora konsidera arguidu komete duni krime hasoru lezadu nu'udar nia aman, arguidu nu'udar lezadu nia oan loloos sei iha meu seluk atu koaliala netik laos uza fali asaun violentu, nune'e husu ba tribunal atu kondena arguidu ho pena prizaun fulan neen suspende ba tinan ida.

Alende ne'e defeza haktuir katak mezmú arguidu hili direitu nonook maibé, lezadu no testemuña konfirma, nune'e husu ba tribunál atu kondena arguidu ho pena ne'ebé justu.

Desizaun

Depoisde avalia faktu hotu tribunál prova katak tebe dala ida iha lezadu nia kabun mamar, buti dala ida iha lezadu nia kakorok no riba lezadu ba rai. Aktu ne'e rezulta lezadu nia ulun kona iha fatuk hetan kanek no raan.

Bazeia ba faktu provadu sira ne'e no tetu mós ho sirkunstánsia atenuante sira hanesan depoisde akontesimentu arguidu di'ak malu kedas ho lezadu no nafatin hela hamutuk iha uma ida to'o agora arguidu la komete tan krime hasoru lezadu, nune'e tribunál konklui prosesu ne'e no kondena arguidu ho pena prizaun fulan haat suspende ba tinan ida.

2. Krime arma brankas no ofensa ba integridade física simples ho natureza violénsia doméstika

Nú. Prosesu	: 0009/20. BCVMS
Kompozisaun Tribunál	: koleтиву
Juis	: Dr. José António D. Escorial, Dra. Florencia Freitas no Dra. Sribuana da Costa
Prokuradora	: Dra. Remizia de Fátima da Silva
Defeza	: Dr. Germano Guterres Ramos
Desizaun	: Pena prizaun tinan 3 suspende ba tinan 3

Iha 09 Juñu 2021, Tribunál Distritál Baukau prezide julgamentu leitura akordaun ba krime arma brankas no ofensa ba integridade física simples ho natureza violénsia doméstika ne'ebé envolve arguidu AS hasoru nia feen, iha Munisípiu Baukau.

Akuzasaun Prokuradora

Prokuradora akuza katak iha 04 Jullu 2020, iha oras tuku 19:00 kalan, arguidu ho lezada diskute malu kona-ba arguidu soe sira nia oan nia roupa no momentu ne'e arguidu kaer hela tudik iha nia liman, nune'e lezada ho arguidu hadau malu tudik no tudik refere kona lezada nia liman fuan parte segundu husi liman loos no rezulta kanek.

Prokuradora akuza arguidu kontra artigu 145 KP kona-ba ofensa ba integridade física simples ho moldura penal to'o tinan 3 ka multa no konjuga ho artigu 2, 3(a), 35(b) no 36 LKVD no Artigu 20 (1), artigu 2 (2 alinea f) kona-ba Lei Arma brankas.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak derepente polisia mai kaer arguidu ba detein iha sela polisia Vemasse. Bainhira arguidu fila husi sela polisia sira di'ak malu kedas no to'o agora arguidu la baku ona lezada. Arguidu deklarata liutan katak sira forma familia dezde tinan 2003, iha oan na'in lima foin primeiraves baku lezada. Arguidu mos deklarata katak arrepende nia hahalok no promete sei la komete tan krime hanesan hasoru lezada iha futuru, arguidu nu'udar agrikultór rezultadu hodi sustenta de'it ba familia.

Alende ne'e, lezada kontinua konfirma faktu hotu iha akuzasaun no deklarata mos katak di'ak malu ona ho arguidu no depoisde akontesimentu arguidu la komete tan krime hasoru lezada.

Alegasa final

Prokuradora haktuir katak arguidu konfesa no konfirma mos husi lezada, tanba ne'e mezmus sira di'ak malu ona nafatin husu ba tribunál atu kondena arguidu ho pena prizaun tinan ida suspende ba tinan rua.

Entretantu, defeza husu ba tribunál atu aplika pena ne'ebé maiz adekua ba arguidu ho konsiderasaun sira katak, arguidu konfesa, arrepende nia hahalok no foin primeiraves komete krime hasoru lezada.

Desizaun

Depoisde avalia faktu hotu, tribunál prova katak arguidu kaer hela tudik iha nia liman, nune'e lezada ho arguidu hadau malu tudik no rezulta tudik refere kona lezada nia liman fuan parte segundu husi liman loos no rezulta kanek.

Bazeia ba faktu provadu sira no tetu mos sirkunstansia atenuante sira hanesan arguidu konfesa, arrepende ninia hahalok no promete sei la repete ninia hahalok ne'e iha futuru no foin primeiraves mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

3. Krime ofensa ba integridade física simples ho natureza violénsia doméstika

Nú. Prosesu : 0053/20. PDBAU
Kompozisaun Tribunál : Singulár
Juis : Dr. José António d. Escurial
Prokuradora : Dr. Bartolomeu de Araújo
Defeza : Dr. Sidonio Maria sarmento
Desizaun : Pena prizaun fulan 3 suspende ba tinan 1

Iha 14 Juñu 2021, Tribunál Distritál Baukau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu DJGF hasoru nia feen, iha Munisípiu Baukau.

Akuzasaun Prokuradora

Prokuradora akuza katak iha 18 Maiu 2020, iha oras tuku 19:45 kalan, arguidu tebe dala ida iha lezada nia kelen parte karuk no tebe dala ida iha lezada nia kelen parte loos no kontinua dudu lezada monu ba kama leten, hafoin lezada hamriik halai sai ba liur arguidu duni tuir lori telefone tuda lezada no kona iha lezada nia ain parte loos. Antes agresaun ne'e, arguidu ho lezada diskute malu kona-ba nesesidade uma laran nian, nune'e mosu agresaun hirak ne'e.

Prokuradora akuza arguidu kontra artigu 145 KP kona-ba krime ofensa ba integridade fizika simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak arrepende nia hahalok, di'ak malu ona ho lezada, iha oan na'in rua foin primeiravés komete krime hasoru lezada no di'ak malu ona ho lezada, servisu nu'udar to'os na'in rezultadu sustenta de'it família.

Alende ne'e, lezada kontinua konfirma faktu sira iha akuzasaun no konfirma ho arguidu nia deklarasaun katak arguidu foin primeiravés komete krime hasoru lezada no arguidu ho lezada di'ak malu ona no kontinua moris hamutuk to'o agora.

Alegasaun finál

Prokuradora haktuir katak mezmú sira di'ak malu ona no moris hamutuk nafatin, maibé atu prevene arguidu repete filafali ninia hahalok hasoru lezada iha futuru no labele hatoman-an uza violénsia hasoru lezada, nune'e husu ba tribunál atu aplika pena prizaun fulan tolu suspende ba tinan ida.

Enkuantu defeza haktuir katak arguidu konfesa faktu hotu, di'ak malu ona, arrepende ninia hahalok, durante forma família iha tempu naruk nia laran foin primeiravés halo agresaun hasoru lezada, ho nune'e husu ba tribunál fó pena ne'ebé justu no adekuadu ba arguidu.

Desizaun

Depoisde avalia faktu hotu, tribunál prova katak arguidu tebe dala ida iha lezada nia kelen parte karuk no tebe dala ida iha lezada nia kelen parte loos no kontinua dudu lezada monu ba kama leten, hafoin lezada hamriik halai sai ba liur arguidu duni tuir lori telefone tuda lezada no kona iha lezada nia ain parte loos.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada no foin primeiravés

komete krime hasoru lezada, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

4. Krime ofensa ba integridade fízika simples ho natureza violénsia doméstika

Nú. Prosesu : 0054/20. MNMNT
Kompozisaun Tribunál : Singulár
Juis : Dra. Maria Modesta de Almeida Viera
Prokuradór : Dr. Bartolomeu de Araújo
Defeza : Dr. Sidonio Maria Sarmiento
Desizaun : Pena prizaun fulan 1 suspende ba tinan 1

Iha 14 Juñu 2021, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu TFdCJ hasoru nia feen, iha Munisípiu Manatuto.

Akuzasaun Prokuradór

Prokuradór akuza katak iha 09 Dezembru 2020, iha oras tuku 13:00 lokraik, arguidu tuku dala ida iha lezada nia kanuruk no tuku dala rua iha lezada nia kabaas, rezulta lezada sofre bubu no moras. Antes agresaun ne'e, arguidu ho lezada diskute malu kona-ba arguidu deskonfia lezada ba lezada nia eis la'en, nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak halo agresaun hasoru lezada, tanba bainhira arguidu ho lezada fila husi misa iha dalan hasoru lezada nia eis la'en lezada piska matan ba ninia eis la'en, nune'e arguidu nerzovu no komete aktu sira ne'e hasoru lezada. Arguidu deklara mós katak arrepende nia hahalok, foin primeiravés komete krime hasoru lezada no nafatin moris hamutuk to'o agora, arguidu nu'udar mekaniku ho vensimentu kada fulan US\$250.00.

Alende ne'e, lezada mós konfirma faktu hotu iha akuzasaun no deklara katak iha akontesimentu ne'e bainhira sira fila husi misa iha dalan sira lao ho ema barak no lezada hamnasa ho sira nia oan, maibé arguidu dehan lezada hamnasa fali ho lezada nia eis la'en, lezada deklara liután katak depoisde akontesimentu ne'e di'ak malu kedas no arguidu foin primeiravés komete krime hasoru lezada no moris hamutuk nafatin nu'udar feen la'en.

Alegasaun finál

Prokuradór haktuir katak mezmu sira di'ak malu ona no moris hamutuk nafatin, maibé atu prevene arguidu repete hahalok hanesan iha futuru no labele hatoman-an uza violénsia hasoru lezada no oan sira, nune'e husu ba tribunál atu aplika pena prizaun fulan tolu suspende ba tinan ida.

Enkuantu defeza haktuir katak arguidu konfesa, di'ak malu ona ho lezada, arrepende ona ninia hahalok, durante forma família foin primeiravés halo agresaun hasoru lezada, ho razaun sira ne'e hotu, husu ba tribunál fó pena ne'ebé kmaan liu ba arguidu.

Desizaun

Depoisde avalia faktu hotu, tribunál prova katak arguidu tuku dala ida iha lezada nia kanuruk no tuku dala rua iha lezada nia kabaas, rezulta lezada sofre bubu no moras.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende nia hahalok, primeiravés komete krime hasoru lezada no di'ak malu ona ho lezada, nune'e tribunál konklui prosesu ne'e kondena arguidu ho pena prizaun fulan ida suspende ba tinan ida.

5. Krime ofensa ba integridade física simples ho natureza violéncia doméstika

Nú. Prosesu	: 0108/20. BCBCV
Kompozisaun Tribunál	: Singulár
Juis	: Dra. Sribuana da Costa
Prokuradora	: Dra. Remizia de Fátima da Silva
Defeza	: Dr. Sidonio Maria Sarmento
Desizaun	: Pena prizaun fulan 6 supende ba tinan 2 ba arguidu AAFB no kondena arguida LMdCB ho pena prizaun fulan 6 suspende ba tinan 2

Iha 15 Juñu 2021, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu AAFB hasoru nia feen LMdCB no arguida LMdCB hasoru nia oan sira VNDCB (idade tinan 11), JLLdC (idade tinan 8) no lezada NNAA (idade tinan 10), iha Munisípiu Baukau.

Akuzasaun Prokuradora

Prokuradora akuza katak iha 20 Dezembru 2020, iha oras tuku 20:00 kalan, arguida foti fiu mutin baku dala ida iha lezada VNDCB nia kelen parte karuk, baku dala ida iha lezada JLLdC parte kidun, baku dala ida iha lezada NNAA nia kelen parte loos. Ho nune'e arguidu tuku dala barak iha lezada LMdCB (nu'udar feen) nia ulun, tuku dala rua iha reen-toos, tuku dala rua iha inus, tuku dala ida iha kabaas, tuku dala ida kotuk laran no tuku dala ida iha liman kabun. Antes agresaun ne'e arguida fase hela roupa iha haris fatin no haruka sira nia oan feto na'in rua ba fó hatene arguidu atu ajuda lezada fase roupa, maibé arguidu lakohi no toka muzika ho lian maka'as halo barullu, tanba ne'e lezada LMdCB hasee arguidu no dehan katak labele toka muzika maka'as, tanba lezada nia inan moras iha uma laran, nune'e arguidu nervozu tuda rahun tiha lezada nia telefone ho marka OPPO no halo agresaun hirak ne'e hasoru lezada.

Prokuradora akuza arguida LMdCB komete krime tolu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(c), 35(b) no 36 LKVD.

Prokuradora akuza arguidu AAFB kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu AAFB deklara katak momentu arguidu fila husi to'os isin moras no rona muzika iha telefone, lezada haruka sira nia oan sira fó hatene arguidu atu ajuda lezada fase roupa maibé arguidu hatan katak isin moras, tanba tuku 22:00 kalan ona, aban mak fase nune'e derepente lezada baku labarik sira iha uma laran, tanba ne'e arguidu nervozu tuda rahun telefone no tuku lezada maibé arguidu la hatene kona iha parte ne'ebé, lezada uza fiu eletrisidade mak baku labarik sira.

Arguida LMdCB deklara katak iha akontesimentu ne'e arguida fase hela roupa, tanba kalan ona arguida sente malirin, nune'e arguida haruka labarik sira ba fó hatene arguidu atu ajuda fase roupa maibé arguidu lakohi nune'e arguida hirus baku fali oan sira uza fiu.

Alende ne'e lezada VNdCB, lezada JLLdC no lezada NNAA konfirma faktu hotu iha akuzasaun.

Alegasaun finál

Prokuradora haktuir katak arguidu AAFB provadu komete krime hasoru lezada hanesan tuku dala barak iha lezada nia isin maibé la hatene kona iha parte ne'ebé, lezada nafatin konfirma akuzasaun. Enkuantu arguida LMdCB provadu komete krime hasoru menór sira ne'ebé tuir loloos hetan protesauun maka'as husi arguida maibé pelo kontrariu arguida mak halo fali agresaun hasoru oan sira. Tanba ne'e husu ba tribunál atu kondena arguidu AAFB ba pena prizaun fulan neen suspende ba tinan ida no kondena arguida LMdCB ba kada krime fulan neen suspende ba tinan ida ho balun.

Alende ne'e defeza haktuir katak arguidu no arguida konfesa faktu hotu iha akuzasaun sira ne'ebe konstitui ba krime, depoisde akontese sira di'ak malu fali ona, arrepende ba sira nia hahalok, foin primeiravés mai hatan iha tribunál, nune'e husu ba tribunál atu aplika pena ne'ebé kmaan liu ba arguidu no arguida.

Desizaun

Depoisde avalia faktu hotu, tribunál prova katak arguidu AAFB tuku dala barak iha lezada LMdCB nia ulun, tuku dala rua iha reen-toos, tuku dala rua iha inus, tuku dala ida iha kabaas, tuku dala ida kotuk laran no tuku dala ida iha liman kabun.

Arguida LMdCB tribunál prova katak baku lezada VNdCB ho fiu iha nia kelen parte karuk, baku lezada JLLdC ho fiu iha parte kidun, baku lezada NNAA iha nia kelen parte loos.

Bazeia ba faktu provadu sira no tetu mós sirkunstánsia atenuante sira hanesan arguidu konfesa, arrepende nia hahalok no promete sei la repete ninia hahalok ne'e iha futuru, nune'e tribunál konklui prosesu ne'e no kondena arguidu AAFB ho pena prizaun fulan neen suspende ba tinan rua no kondena arguidu LMdCB ba krime tolu kada krime kondena ho pena prizaun fulan neen no aplika pena únika fulan neen prizaun no suspende ba tinan rua.

6. Krime ofensa ba integridade fízika simples ho natureza violénsia doméstika

Nú. Prosesu : 0001/21. BCQLC
Kompozisaun Tribunál : Singulár
Juis : Dra. Maria Modesta de Almeida Viera
Prokuradór : Dr. João Marques
Defeza : Dr. Jose Maria Caetano Guterres
Desizaun : Pena prizaun fulan 3 suspende ba tinan 1

Iha 15 Juñu 2021, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AF hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 16 Janeiru 2021, iha oras tuku 07:00 dadeer, arguidu tuku dala lima iha lezada nia ulun. Antes agresaun ne'e, arguidu ho lezada diskute malu kona-ba arguidu bolu lezada atu ba foti foos iha merkadu, maibé lezada lakohi, ho nune'e mosu agresaun sira ne'e no lezada ba hato'o keixa iha polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, no deklara katak arrepende nia hahalok, di'ak malu ona ho lezada, forma família iha tinan 2019, foin primeiravés baku lezada, moris hamutuk nafatin no to'o agora la baku ona lezada no arguidu nu'udar agrikultór rezultadu sustenta de'it ba família

Alende ne'e lezada kontinua konfirma faktu hotu iha akuzasaun no deklara mós katak di'ak malu ona ho lezada no depoisde akontesimentu ne'e arguidu la baku ona lezada.

Alegasaun finál

Prokuradór haktuir katak arguidu provadu komete krime ne'ebé akuza ba arguidu, bazeia ba konfisaun arguidu nian no konfirma mós husi lezada, mezmu sira di'ak malu ona no moris hamutuk nafatin maibé atu prevene arguidu repete nia hahalok ne'e iha futuru no eduka mós comunidade sira ne'ebé besik arguidu, nune'e husu ba tribunál atu aplika pena prizaun fulan tolu suspende ba tinan ida.

Enkuantu defeza haktuir katak arguidu konfesa, di'ak malu ona ho lezada, arrepende ninia hahalok, durante forma família iha tempu naruk nia laran foin primeiravés halo agresaun hasoru lezada, nune'e husu ba tribunál fó pena ne'ebé adekuaudu ba arguidu.

Desizaun

Depoisde avalia faktu hotu, tribunál prova katak arguidu tuku dala lima iha lezada nia ulun. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, primeiravés komete krime hasoru lezada, no di'ak malu ona ho lezada, nune'e tribunál konklui prosesu ne'e kondena arguidu ho pena prizaun fulan tolu suspende ba tinan ida.

7. Krime maus-tratus ba kónjuje

Nú. Prosesu : 0034/19. BCBCV
Kompozisaun Tribunál : Koletivu
Juis : Dr. José António d. Escorial no Dra. Florencia Freitas, Dra. Sribuana da Costa
Prokuradora : Dra. Remizia de Fátima da Silva
Defeza : Dr. Grigório Maria Lourdes de Lima
Desizaun : Pena prizaun tinan 2 suspende ba tinan 2

Iha 22 Juñu 2021, Tribunál Distritál Baukau prezide julgamentul leitura akordaun ba krime maus-tratus ba kónjuje ne'ebé envolve arguidu MdC hasoru nia feen, iha Munisípiu Baukau.

Akuzasaun Prokuradora

Prokuradora akuza katak, iha 31 Maiu 2019, arguidu tebe dala ida iha lezada nia ain, no continua tama ba kioske laran foti katana no dehan ba lezada "*orsida hau taa rahun tiha ó,*" nune'e lezada halai ba subar kuaze oras ida ho balun, hafoin para bis no ba hato'o keixa iha Eskuadra Polísia Baukau Vila. Antes agresaun ne'e, arguidu ho lezada diskute malu kona-ba lezada nia família atu uza arguidu no lezada sira nia kareta, ho nune'e mosu agresaun ne'e no durante moris hamutuk hahú iha 2010, arguidu sempre baku bei-beik lezada.

Prokuradora akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 prizaun no konjuga ho artigu 2, 3(a), 35(a) no 36 LKVD.

Produsaun ba prova sira

Iha julgamentu, arguidu deklara katak iha akontesimentu ne'e arguidu tebe dala ida iha lezada nia ain, no arguidu kolia duni atu taa rahun lezada, maibé arguidu la tama ba kioske laran foti katana so koalía de'it. Derepente polísia ba bolu arguidu lori ba sela Polísia Eskuadra Baukau Vila. Enkuantu kona-ba durante moris hamutuk arguidu sempre baku lezada, arguidu deklara katak laloos bebeik, maibé dala ida de'it arguidu ho lezada diskute malu mak arguidu basa dala ida iha lezada nia hasan. Arguidu mós deklara katak depoisde akontesimentu ne'e di'ak malu ona ho lezada, arrepende nia

hahalok no promete iha sei la komete tan kualkér krime hasoru família ka ema seluk, arguidu nu'udar negosiante fulan ida bele hetan osan liu US\$1,000.00 no bele menus.

Alende ne'e, lezada mós deklara katak arguidu koalia de'it atu taa rahun maibé, la tama ba kioske laran hodi foti katana, kona-ba durante moris hamutuk arguidu sempre baku lezada, lezada deklara laloos baku bebeik maibé arguidu basa dala ida de'it iha lezada nia hasan bainhira arguidu ho lezada diskute malu.

Alegasaun finál

Prokuradora haktuir katak mezmú arguidu ho lezada koko atu nega faktu balun, maibé prokuradór nafatin mantein ho akuzasaun katak arguidu provadu komete duni krime tuir faktu sira iha akuzasaun. Arguidu komete krime ne'e ho livre no vontade rasik hasoru lezada. Tanba ne'e, husu ba tribunál atu kondena arguidu tuir pena iha artigu 154 KP ne'ebé akuza ba arguidu.

Entretantu defeza husu ba tribunál atu aplika pena ne'ebé adekuadu ba arguidu bazeia ba sirkunstánsia atenuante sira hanesan arguidu deklara de'it faktu ne'ebé nia komete no konfirma mós husi lezada, arrepende nia hahalok, di'ak malu ona ho lezada no promete sei la komete tan krime hanesan hasoru lezada ka ema seluk iha futuro.

Desizaun

Depoisde avalia faktu hotu, tribunál prova katak arguidu tebe dala ida iha lezada nia ain no dehan katak "*orsida taa rahun tiha ó,*" no antes akontesimentu ne'e arguidu ho lezada diskute malu arguidu basa dala ida iha lezada nia hasan.

Bazeia ba faktu provadu sira ne'e no tetu mós sirkunstánsia atenuante sira hanesan arguidu arrepende nia hahalok no promete sei la repete hahalok hanesan hasoru lezada iha futuro, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

8. Krime ofensa ba integridade fizika simples ho natureza violénsia doméstika

Nú. Prosesu	: 0079/20. BCBCV
Kompozisaun Tribunál	: Singulár
Juis	: Dr. José António d. Escurial
Prokuradór	: Dr. João Marques
Defeza	: Dr. Germano Guterres Ramos
Desizaun	: Pena prizaun fulan 2 suspende ba tinan 1

Iha 28 Juñu 2021, Tribunál Distritál Baukau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu JdS hasoru nia feen, iha Munisípiu Baukau.

Akuzasaun Prokuradór

Prokuradór akuza katak, iha 21 Jullu 2020, iha oras tuku 10:00 dadeer, arguidu tuku dala ida iha lezada nia kabun no tuku dala ida iha lezada nia mata fukun. Antes agresaun ne'e, arguidu ho lezada diskute malu kona-ba arguidu hakarak lori fore-rai

saku ida ba oan sira iha Dili, maibé lezada dehan lori de'it saku sorin ba Dili, nune'e mosu agresaun hirak ne'e.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa, no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak di'ak malu ona ho lezada, arrepende nia hahalok, forma família iha tinan 1986 iha oan na'in tolu foin primeiravés halo agresaun hasoru lezada, servisu nu'udar agrikultór rezultadu hodi sustenta de'it ba família.

Alende ne'e, lezada kontinua konfirma faktu hotu iha akuzasaun no deklara mós katak di'ak malu ona ho arguidu no depoisde akontesimentu ne'e to'o agora arguidu la baku ona lezada.

Alegasaun finál

Prokuradór haktuir katak arguidu provadu komete krime hasoru lezada bazeia ba deklarasaun arguidu nian no konfirmasaun lezada nian ba faktu sira iha akuzasaun. Atu prevene arguidu repete tan ninia hahalok ne'e iha futuru no labele halo tan agresaun hasoru lezada no membru família sira seluk, husu ba tribunál atu kondena arguidu ho pena prizaun fulan tolu suspende ba tinan ida.

Entretantu, defeza husu ba tribunál atu aplika pena ne'ebé adekuadu ba arguidu tanba sira moris hamutuk kuaze tinan tolu nulu resin lima ona foin primeiravés komete krime hasoru lezada, bazeia ba sirkunstánsia atenuante sira hanesan arguidu foin primeiravés mai hatan iha tribunál, di'ak malu ona ho lezada no promete sei la repete ninia hahalok ne'e iha futuru.

Desizaun

Depoisde avalia faktu hotu, tribunál prova katak arguidu tuku dala ida iha lezada nia kabun no tuku dala ida iha lezada nia mata fukun.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun fulan rua suspende ba tinan ida.

9. Krime arma brankas

Nú. Prosesu	: 0102/18. LASIC
Kompozisaun Tribunál	: Koletivu
Juis	: Dra. Maria Modesta d. A. Viera no Dr. José A. Escurial, Dra. Sribuana da Costa
Prokuradór	: Dr. Julio da Silva Correia

Defeza : Dr. Jose Maria C. Guterres
Desizaun : Pena prizaun tinan 3 suspende ba tinan 3

Iha 30 Juñu 2021, Tribunál Distritál Baukau prezide julgamentu leitura akordaun ba krime arma brankas ne'ebé envolve arguidu David Ricardo hasoru Estadu RDTL iha Suku Fuiluru, Postu Administrativu Lospalos, Munisípiu Lautem.

Akuzasaun Prokuradór

Prokuradór akuza katak iha 16 Novembru 2018, iha oras tuku 20:00 kalan testemuña Cipriano da Costa hamriik iha nia uma oin haree arguidu tun husi ojek iha estrada kaer ho surik hodi hakilar dehan 22 hamriik metin hau taa kedas, nune'e testemuña Cipriano da Costa tauk halai inklui komunidadade sira iha fatin akontesimentu lakleur polisia to'o atua kedas arguidu.

Prokuradór akuza arguidu kontra artigu 20 (1), artigu 2 (2 alinea f) kona-ba Lei Arma Brankas.

Produsaun ba prova sira

Iha prosesu julgamentu, arguidu deklara katak momentu ne'e arguidu ho maluk sira hemu tua sabu jerigen litru lima rua, nune'e arguidu ho kondisaun lanu todan la hatene momentu halo saida iha fatin ne'e, maibé bainhira kondisaun normal fali foin hatene katak arguidu sala ona no surik ne'ebé arguidu lori ne'e avo sira ni'an ne'ebé uza ba barlake. Arguidu foin primeiravés mai hatan iha tribunál no arrepende nia hahalok.

Entretantu, testemuña Cipriano da Costa ho idade tinan 58, hela besik fatin akontesimentu deklara katak hamriik iha nia uma oin haree arguidu tun husi ojek kaer ho surik ida hodi hakilar dehan 22 hamriik metin hau taa kedas, testemuña mós la hatene saida mak 22, nune'e testemuña ho labarik sira inklui komunidadade sira seluk mós halai namkari hotu.

Alegasaun finál

Prokuradór haktuir katak arguidu provadu komete krime ne'ebé imputa ba nia bazeia ba arguidu no testemuña nia deklarasaun perante audensia julgamentu haree ba arguidu nia aktu ne'e halo komunidadade sira trauma. Tanba ne'e, husu ba tribunál atu kondena arguidu ho pena prizaun tinan rua suspende ba tinan tolu.

Entretantu defeza haktuir katak momentu arguidu ho kondisaun lanu, la hatene an ba foti avo nia surik ne'ebé avo sira uza ba barlake, arguidu foin primeiravés mai hatan iha tribunal, arrepende nia hahalok. Tanba ne'e, husu ba tribunál atu aplika pena ne'ebé kmaan liu ba arguidu

Desizaun

Depoisde avalia faktu hotu, tribunál prova katak arguidu tun husi ojek iha estrada kaer ho surik hodi hakilar dehan 22 hamriik metin hau taa kedas.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu

Atu hetan informasaun kompleitu, favór kontaktu:

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl